

Här Fernand Etgen
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, den 19. September 2019

Här President,

esou wéi d'Chambersreglement et virgesäit, bieden ech Iech, dës parlamentaresch Fro un d'Madame Ëmweltminister weiderzeleeden.

D'Wichtigkeet vum Ëmweltschutz ass een Deel vum Konsens, deen all politesch Parteien zu Lëtzebuerg mat droen. Ëmsou méi evident ass et, datt muss drop Verlooss sinn, datt existéierend Reglementatiounen net nëmmen agehalen, mee och gerecht an onparteilech applizéiert ginn.

Dëst gëllt och fir Agrëffer an d'Natur, respektiv fir Autorisatiounen fir Renovatiounsaarbechten u bestoende Constructiounen an enger «zone verte». No dem Artikel 7(2) vum Naturschutzgesetz vum 18. Juli 2018 brauch et jo dofir eng Autorisatioun vum zoustännege Minister.

Besonesch wichteg sinn och déi legal Dispositiounen, déi de Bestand vun Hecken a Beem an Naturschutzzone solle garantéieren an onerlaabten Äerdaarbechten oder Ofholze solle verhënneren.

Besonesch an der Gemeng Déifferdeng sinn dozou eng Rei vu Froen an der Aktualitéit opgedaucht.

An deem Zesammenhank wollt ech der Madame Ëmweltminister dës Froe stellen:

1. Kann d'Madame Ëmweltminister confirméieren, datt an der Gemeng Déifferdeng am Joer 2019 Aarbechten an der «Zone verte», respektiv an der «réserve naturelle Prënzebiërg» gemaach goufen, ouni dat eng Autorisatioun am viraus agereecht an accordéiert gouf? Wa jo, wou waren déi Aarbechte genee?
2. Wéi reagiert den Ëmweltministère op eng Situatioun, an där net erlaabten Aarbechten an engem Ëmweltschutzgesetz gemaach ginn?

- a. Préift den Ëmweltministère konform zum Punkt 5 aus dem Artikel 7 vum uewe genannten Naturschutzgesetz, ob déi betrafte Constructioun legal mat de jeeweiligen Autorisatiounen erbaut gouf? Wann net, wéi reagéiert d'Madame Minister dorop?
 - b. Kann d'Madame Ëmweltminister Aussoen aus der Press confirméieren, datt bei Baustoppen duerch feelend Geneemegungen dacks bannent engem Dag nodréiglech Autorisatiounen erstallt ginn, obwuel jo gewosst ass, datt bei esou Autorisatiounen den Dossier misst *pour information* un déi betrafte Gemeng geschéckt ginn? Gëtt en Avis vun der Gemeng ofgewart?
 - c. Ginn esou Demanden *pour avis* bei d'Naturverwaltung, fir datt si, an och z.B. de lokale Fieschter, kënnen am viraus en Avis schreiwen, ier et zu enger eventueller Erlaabnis kënnst?
 - d. Wéi eng vun dësen oder nach anere Prozedure goufen am Joer 2019 zu Déifferdeng bei net am viraus autoriséierten Aarbechten applizéiert? Mat wéi enge Resultater?
3. An den Naturschutzgebidder sti Restriktiounen an Interdictiounen an deene jeeeweilige Veruerdnungen, déi weder dérogeabel nach autorisabel sinn. Dëst ass z.B. och de Fall am Naturschutzgebitt „Giele Botter“, wou am Artikel 3 vum groussherzogleche Reglement vum 20. November 1991 dra steet, datt Terrassementer verbuede sinn (*changement d'affectation des sols, toute construction incorporée au sol ou non...*). Ass der Madame Minister e Verstouss géint dee Verbuet bekannt? Wa jo, wann d'Madame Minister esou e Verstouss oder Verstéiss kennt, huet si dëst an alle Fäll un de Parquet viru ginn? Wann net, firwat net?
 4. No Artikel 17 vum Naturschutzgesetz däerfen Hecken a verschidde Zonë just vun Ufank November bis Enn Februar ewech gemaach ginn. Wat ass deemno de Suivi vun esou enger Infraktioun, also wann Hecke baussent där Period ewech gemaach ginn, wann si dem Ëmweltministère bekannt gëtt? Ass esou eng Infraktioun am Joer 2019 zu Déifferdeng festgestallt ginn a wéi huet d'Madame Minister reagéiert?
 5. Wéi eng Prozedure sinn ze respektéieren, wann an engem Naturschutzgebitt Beem ewech gemaach ginn, vun deenen ugeholl oder behaupt gëtt, datt si krank wieren? Muss do am viraus en Avis vum Fieschter virleien? Muss gepréift ginn, op déi Beem net eventuell en Habitat fir aner protegéiert Planzen oder Déiere sinn?
 6. Goufen am Beräich vun den Naturschutzgebidder zu Déifferdeng am Joer 2019 Beem ewech gemaach a gouf et dofir eng Erlaabnis am Viraus? Wann et keng Erlaabnis gouf, wéi eng Moosnamen huet d'Madame Ëmweltminister geholl?

Mat déiwem Respekt,



Fernand Kartheiser
Deputéierten